

Paulo Ena Marere PILEMONA Herenai

Puka Aona Irerena 'Abina

Pilemona hanona hau apa'uana ha, ia hanona a'ikakauma haukia Koloseai haukia niraonanakia. Pilemona hanona mai ena ta'ara'i hauna, ia atana hana Onesimo. Onesimo hanona ebeau 'akaumana ena poki hauna herenai, ba eao aiara haeai ha aonai emiaho. Aiara weianai Paulo ohi tebaitabu ahi ba eraona kabe. Rani weianai Paulo hanona wapura 'ekanai buonai Pilemona kipokia kate'abi'abi hanona epahihi. Ua buonai marere neiana ererena, ba Onesimo ebena, ia kehore kea'ina keaoaina ena poki hauna kebena.

Marere neiana aonai, Paulo ehore Pilemona eba'amena ena ta'ara'i hauna kea'ina mai aona namonai. Abomo ehina bena Onesimo hanona aba eraona kabe ena mauri Obiapaka ebena. Paulo mai aona ikoinai Pilemona enoina bariu rani neianai keaoaina aonai Onesimo keaparina ia uaho'abana tohana.

Puka Paipana Apa'uakia

- a. Roba iahu. (1-3)
- b. Banamo 'abina. (4-7)
- c. Enoina Onesimo paunai. (8-22)
- d. 'Abi orena. (23-25)

Banamo 'Abina.

¹ Au Paulo, Keriso Iesu paunai nawapura hau'u, mai uaho'abaka Timoteo ohi marere tarerena

niwahi Pilemona, emai hau ki'amu kipokia haka
haeamo haumu heremu,

² mai haibuka Apia, Arekipo nahahuari
haeamo hauna mai Tirama ena marea haukia
naia emu ituai tuto'u haeamo haukia ikoimiai
heremi.

³ Nabahuba'ari Tirama aika Hamaka mai Obi-
apaka Iesu Keriso ekia aoko'o hoana mai baibua
hanona heremiai kemiaho.

Pilemona Ena Raona'au Mai A'ikakauma.

⁴ Rani ikoinai e'u bahuba'ari ai oi naraonani'o
haeamona e'u Tirama namo 'abina nabena,

⁵ pokina emu a'ikakauma Obiapaka Iesu
herenai hauna mai emu raona'au Tirama ena
maearima robekia ikoikiai herekiai hauna
poukia aba ao'o.

⁶ Au nabahuba'ari hanona eka baihouai oi emu
a'ikakauma keaka harai aonai taba namokia
weiakia Keriso aonai aba ha'inakia haukia
maikoinai obokia kobo harai.

⁷ Hati'u ki'amu e, emu raona'au weiana ehore
e'u aonamo ebapa'ua ki'a bahana mai ao'u
ebatabura ki'ana, pokina uaho'abaka Tirama ena
robe haukia aokia oba'amarina paunai.

Paulo Onesimo Paunai Enoi.

⁸ Ua buonai Keriso aonai au hanona panuako'o
pabahi ahini'o aka berona kobabaina.

⁹ Iamo naraona'au aini'o paunai, ua a'i kahoma
ia nanoini'o. Au Paulo bariu aba akiro abomo
Keriso Iesu paunai nawapura hau'u,

¹⁰ naha'u Onesimo paunai au oi nanoini'o, ia
hanona au naha'uai eao weia wapura itunai
amiaho aonai.

11 'Uainai hanona ia ena namo aha'i oi here-muai, ia bariu hanona ena namo aba eapa'ua oi mai au herekai.

12 Au hanona ia nauhu muena niwahi heremu. Iamo ao'u tohanai naraona'au aina hauna nauhuna.

13 Au neia pou namona paunai nawapura aonai nanuatae pa'i 'inina pemiaho oi 'ekamu pea'ina au pebaraina'u.

14 Ia au taba ha'i kababaina keaomo oi ko'abi harai 'uai, ba oi emu namo ha au here'uai kobabaina, weiana hanona oi emu nuataeai kobabaina ia au e'u bahiahi paunai a'i kobabaina.

15 Onesimo hanona rani papana ehaboni'o, ba-iatami epa'a buonai bariu hanona koa'i muena heremuai kemiaho baihana.

16 Ia hanona ta'ara'i hauna 'abaeana aha'i, 'a ia hanona enamo ki'a baha ba ta'ara'i haukia, ia hanona uaho'abaka raona'auna, au ia naraona'au aina, iamo oi hanona koraona'auai ki'a bahana, ia hanona ta'ara'i hauna mai uaho'abaka tohana Obiapaka aonai.

17 Ua buonai, oi nuraonana au emu hau toha'u raninai, Onesimo koa'i taea haraina matoha au nua'i taeana'u 'abana.

18 Ia oi heremuai taba ha ea'i ki'ana 'ao here-muai ena a'i 'abaea ha re'a, taba weiakia ikoikiai hanona au e'u pumai kateao.

19 Au Paulo 'abi neiana au kipo'u ima'uai nar-erena. 'Ara bita hanona ikoinai 'araki kahore-nakia. (Ia oi abaraini'o bamauri otabu ahina hauna robana a'i nahuna.)

20 Ua buonai, hati'u e, au nanoini'o Obiapaka atanai e'u nuatae naiana kobabaina, Keriso aonai ao'u koba'amarina.

²¹ Au marere neiana narerena hanona a'iohina e'u noi heremuai hauna akana aba kobabaina, ba kobabai banaina.

²² Haeamona ituai baki ikaihurina ha koa'ia'i haraina au 'eu'u, pokina e'u buabeni Tirama herenai hanona emi bahuba'ari kea'i taeana ba au kawahi heremu.

Banamo 'Abina Orena.

²³ Au 'aba'u ha Epafra, Keriso Iesu paunai tararua tawapura haeamo hauna ena banamo 'abina neuhuna oi heremu.

²⁴ Abomo Mareko, Aristako, Dema, mai Luka, au kipokia taka haeamo haukia ekia banamo 'abikia teuhunakia.

²⁵ Nabahuba'ari eka Obiapaka Iesu Keriso ena aoko'o hoana hanona wai aubamiai kemiaho.

'Abi'uai Apa'uana Mahamahana
The New Testament in the Waima Language of Papua
New Guinea
Nupela Testamen long tokples Waima long Niugini

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 18 Apr 2025 from source files dated 31 Aug 2023

cec16783-6218-5812-9255-85478fb5e61c